

DIE ABVERHEITE

Wisse Si was mir uusspile ?

E Prysrätsel

Wenn e Gschäft uff aimool nimme rächt lauft,
Numme zwaimool im Monet no ebbis verkauft,
Und an d'Propaganda kaine me glaubt
— Im Regglamechef isch 's Hirni verstaubt,
Wenn e Stadt nit rächt waiss, wie si Fremdi soll logge,
Dr Devisegoldesel im Land aafobt bogge,
Wenn 's normali Dängge zue nyt me fiehrt
— Denn wird e «Wettbewärb» inszeniert.

In Amerika, Afrika und au Eurasie
Bringe Frooge-n-und Prys d'Lyt ganz in Ekstasie.
Numme Basel zieht druus no kai rächte Profit,
Wenn's nit änderet, gheere mr nimm zue de Lyt.
Mr hätte doch z'Basel in alle Sparte
Meegligkaite zem Wettbewärb starte.
(E baseldytsch Wort git's drfir zwor nit,
Aber 's git halt au Sache wo's ainewäg git.)

In alle Problemlü, wo-n-ys blooge,
Kennt me doch d'Allgemeinhait frooge
Und, statt sich fir gueti Leesige z'schinde,
Si pfundwys uff em Schrybdisch finde.
Ebb me die ka bruuche isch nit so wichtig,
Wenn si glunge sinn, denn sinn si richtig.
Und dänggt me-n-an d'Fasnacht — fir Clique-n-und Wäge
Wär sone Froogspil e raine Säge.

Wenn d'Mentsche gsehn d'Fortuna lache,
Dien pletziig Idee in ihne verwache.
Denn findet ain im wysse Kittel
Gege d'Strosseverstopfig e-n-Abfiehrmittel,
Und ain e Lokal fir d'Ladärne, wo lär isch.
Will so ebbis aber fir 's Comité z'schwär isch,
So losst me die, wo gar nyt wott groote.
E Schottemarsch regierigsroote.

Fir die Laischtige darf me scho Prys vergäh,
Bi de Zeedel aber belohnt me dä,
Wo Värs, wo kai Männi dinn vorkunnt, verfasst,
Jetz ha-n-ych die Chance halt scho verbasst.
— Gänn jedem uff dr Strooss e Stimm,
Und mr bruuche-n-au d'Heere vom Comité nimm.
Sotte die denn dr Sinn vom Läbe verliere,
Nu — si kenne jo hälfe bim Boscht sortiere.

Au mir Abverheite hänn dänggt 's dät ys nutze
Mr liesste-n-e baar im e Wettbewärb butze.
Mr miesste fir d'Fasnacht denn weniger sprytte
Fir 's Sujet und 's Goschtym, d'Ladärnesytte.
— Was d'Modelyt vorschlehn, sinn luuter Niete,
Die hänn nyt als Minijintli z'biere.
Als Goschtym fir uns, wär das nit comme il faut,
Joo — wäge dr Johreszyt und esoo.

D'Ladärneentwurf ka niemets verstoh,
E Strich dert, e Punggt und e Flechi do,
Die hittigi Wält isch fir uns halt z'modärn
— Mir mache-n-e Wettbewärb cliquenintärn.
Jede Vorschlag wird jetz akzeptiert
(Wenn's z'spoot isch wird maischtens no regglamiert)
Und kai Idee fallt unter dr Disch,
wo uff irgend e-n-Art no z'bruüche-n-isch.

Mr spile halt alles uff aimool uus
Und kemme-n-aigedlig sälber nimm druus.
Wie sotte do d'Lyt uff dr Strooss begryffe,
Was fir Wäse do ane-n-e durepfyffe?
Mr strahle-n-und unser Gsichtli lacht,
Me sait ys, mr lychte sogar in dr Nacht.
Drnäbe-n-aber — villicht isch das 's Glychi —
Isch jedes e fimffachi Vogelschychi.

Dr erscht Prys uus unserem Ladärnewettbewärb
isch am Zyschdig uusgestellt in dr Halle vom **EW an dr Voltastroos**.
Si isch offe vo de morgo am nynti bis z'nacht am elfi
's Dram Nr. 1 haltet fascht diräggt vor dr Halle.
D'Haltstell haisst: Rhyhafe Santihans.